

Note editoriâl

Il *Gjornâl Furlan des Siencis/Friulian Journal of Science* al invie, cun chest numar, la publicazion di rassegnis lungjis, che si zontin a lis rassegnis plui curtis che la riviste e publiche za dal prin numar.

Cun cheste sielte, la riviste e intint dâ spazi a contribûts che, cun completece, soliditât sientifiche e clarece argomentative, a ufrissin sintesi aprofondidis e, se pussibil, interdissiplinârs su temis clâf de ricercje atuâl e di avanvuardie.

Cu la publicazion des rassegnis lungjis, che, su la base de sielte dai autôrs, a podaran jessi scritis par furlan e inglês o ancje dome par furlan, il GFS/FJS, in plui di promovi il dialic academic, al vûl meti a disposizion dai studiôs e dai ricercjadôrs un altri imprest ancjemò par sostignî la produzion di scriture sientifiche di cualitât in lenghe furlane.

Tal câs che une rassegne lungje e impegni ancje un grant numar di pagjinis, e podarà jessi publicade tant che numar monografic de riviste. Al è propit chest il câs de prime rassegne lungje che il GFS/FJS al ospite: scrite di Antonino Morassi, e je dedicate ai “Problemis inviers par nanostruturis” e, par sielte dal autôr, e ven publicade dome par furlan.